

札

樸

札樸第三目錄

覽古

灤水

伎

密山

李

咨事爲謀

例

瓜裂

幹

鹽

青黑

木頭

牙

坐

熹微

類

樽

嫫媿

棧

狂屈

醖

豹直

簞

允吾

寒具

儻

李尚隱

通之

薦柱

女字繫姓

贍

東閣

棺和

竭來

班劍

象輅

黑水

頤頤

湍

膚寸

列

先游

肱

撰

蜚

飲器

充隱

援

貂

齷齪

沙

假

麤

哈

張仲景

何侯

蔡文姬

安車

緹縉

鬪場

職儀

油火

天

憚

卵蒜

三刀爲州

油油

離樓

行藥

森忽

拾

籤

蛻

料

移

蜀先主名字

旌

酌

灌佛

釋詁釋言釋訓

刊山

以舟量物

生

亢聞

獨斷

補文選注

絃

替

強近

點

加治點

列口

帶

需

專輒

涉躐

水冶

風不鳴條

涎

雪桃

彭越

漸離

貼帖

染輪

振楮

葩

蓆

狡

韌

都市

白疊布

赭白馬

札樸第三目錄終

札樸第三

曲阜 桂馥 未公

覽古

灤水

說文濡水出涿郡故安從水需聲人朱切廣韻濡水名
出涿郡乃官切通鑑魏主珪北巡至濡源注云濡音乃
官翻馥案濡水卽灤水酈注水經云汗水北入難河濡
難聲相近通鑑開元二年薛訥擊契丹行至灤水山峽
中爲伏兵所敗卽濡水也

隸體需與相溷故有人朱乃官二切

枝

玉篇枝下云懞枝害心漢書地理志民俗懞枝鹽鐵論
枝害不恭詩雄雉不枝不求傳云枝害箋云我君子之
行不疾害論語引詩不枝不求馬融曰枝害也

密山

穆天子傳於是得玉榮枝斯之英郭注云山海經曰黃
帝乃取密山之玉榮而投之鍾山之陽是也馥案西山
經作崧山又云崧山多丹木黃華赤實陶讀山海經詩
丹木生何許乃在崧山陽崧音密以同音借密字詩詁
云凡玉之生有榮有英有華榮謂玉之始生如草木之

榮也

𠂔

俗書學字作𠂔亦有所承宋景文云北齊時里俗多作
偽字以文子爲學馥案𠂔乃𠂔之變體𠂔通用學漢碑
作學變𠂔爲𠂔其來已久不始於北齊

咨事爲謀

魯語咨事爲謀韋注云事當爲難傳曰咨難爲謀馥謂
事卽難事不煩改就傳文詩周爰咨謀毛傳云咨事之
難易爲謀是也又案春秋繁露聽作謀謀者謀事也呂
氏春秋謀者疑也疑則從義斷事鄭注大傳君聽不聽

則是不能謀其事也凡此皆主事言

例

家語刑政篇刑例也例成也壹成而不可更故君子盡心焉鄭注秋官司寇引孝經說刑者例也過出罪施賈疏云孝經援神契五刑章曰刑者例也過出罪施者下例爲著也行刑者所以著人身體過誤者出之實罪者施刑馥謂著人身體故壹成而不可更

瓜裂

草黃菟瓜御覽引孫炎云一名瓜裂釋草下文云茹蕓豕首孫以茹字上屬御覽譌作裂說文蕓不云茹蕓馥

疑釋草當是黃菟瓜瓜茆表二名說文云菟瓜不及瓜
茆者但舉正名耳

幹

淮南時則訓令百工審金鐵皮革筋角箭幹脂膠丹漆
無有不良案幹借字正作稈長笛賦作箭橐是也周禮
夏官有橐人掌弓弩之事考工記矢人爲矢以其筈厚
爲之羽深鄭注筈讀爲橐謂矢幹

鹽

樂府昔昔鹽鹽借字當爲鹽郊特牲而流示之禽而鹽
諸利以觀其不犯命也注云鹽讀爲鹽行田示之以禽

使歆鑑之觀其用命不也

青黑

或問青黑異色今呼黑布爲青布何故荅之曰禮器或素或青夏造殷因鄭注變白黑言素青者秦二世時趙高欲作亂或以青爲黑黑爲黃民言從之至今語猶存也馥案禹貢厥土青黎王肅云青黑色

木頭

木以頭偁取義於人頭考工記車人之事半矩謂之宜注云矩法也所法者人也半矩尺三寸三分寸之一人頭之長也柯槨之木頭取名焉引易巽爲宜髮疏云下

云一宣有半謂之櫪一櫪有半謂之柯柯櫪皆從宣上
取數故云頭取名焉猶言取名於頭也馥謂柯櫪諸器
初以人頭取度其後無度之木亦沿頭俾蓋古者寸尺
咫尋常仞諸度量皆以人之體爲法故半矩法人頭工
師伐木必有度隨稱木頭

考工記車人爲車轂長半柯輻長一柯有半鄭司農
云柯長三尺謂斧柯因以爲度馥謂柯既有準工師
遂用量物詩云伐柯伐柯其則不遠

平

周禮以參互攷日成故書互爲巨杜子春讀爲參互掌

舍設桎杻再重故書桎爲柜杜子春讀爲桎杻脩閭氏
掌比國中宿互櫟者故書互爲巨鄭司農云巨當爲互
謂行馬所以障互禁止人也互巨易譌故隸變互爲互
坐

文選張茂先雜詩蘭膏坐自疑李善云無故自疑曰坐
張景陽雜詩百籟坐自吟李云無故自吟曰坐

熹微

文選歸去來辭恨晨光之熹微李善引聲類熹亦熙字
熙光明也案管子侈靡篇古之祭有時而星燿注云燿
星之明或有祭明星者馥謂燿爲星光晨星將沒故微

也

類

周書大開武曰滌文破典典不式教民乃不類案王注
楚辭類法也

搏

廣韻搏挫趨也案此注兩義當云挫也趨也戰國策伏
軾搏銜注搏挫也曲禮君子恭敬搏節退讓以明禮注
搏猶趨也

嫫媿

韓退之元和聖德詩日君月妃煥赫嫫媿注云煥赫謂

日嫫嫫謂月言日月光媚也太元萋萋之離不宜熒且
嫫注云萋萋猶蔓蔓離爲日熒爲月君夢然若日之將
出不宜熒然若月之將毀案韓詩本此而意實不同說
文嫫嫫嫫也一曰弱也本兩義韓詩嫫嫫謂美好古樂
府珠佩嫫嫫戲金闕是也大元熒且嫫則弱意也

栳

史記曰者傳今夫卜者必法天地象四時順於仁義分
策定卦旋式正基然後言天地之利害事之成敗庾開
府詩楓子留爲式桐孫待作琴廣韻楓木名子可爲式
孫炎注爾雅云櫛櫛生江上有奇生枝高三四尺生毛

一名楓子周禮春官太史抱天時與太師同車鄭司農云大出師則太史主抱式以知天時處吉凶漢書藝文志有羨門式法通作式王莽傳天文郎案式於前廣雅曲道式榻也榻有天地所以推陰陽占吉凶以楓子棗心木爲之

奇生枝廣韻作較又作較云木別生也

狂屈

甘泉賦捎夔魑扶僑狂李頤說狂屈倂張似人而非也

狂屈卽僑狂

信案莊子知北遊篇登狐闔之上而睹狂屈李注狂屈似人而非也

醪

廣雅醕酢也案伊尹曰酸而不樂說文樂食辛樂也醕卽樂之異文

豹直

見聞錄御史舊例初入臺陪直比五日衆官皆出此人獨留曰豹直案豹卽爆廣韻爆直史官集韻爆越也漢制新到官府併上直謂之爆今俗謂程外課作者爲爆工馥案漢制疑作唐制唐志有之

薦

余過湖南見澤上安小蓬曩聞楚謂筏上居曰薦此是歇

允吾

漢志金城郡有允吾縣案允吾蠻夷充耳或作玕瑋又
名瑁玕廣韻玕充耳玉吾讀若牙

寒具

干寶說司徒儀吏死祭用麟麋三十韻會麟麋獾餅也
卽今寒具集韻饅饅寒具又云寒饌餅屬廣韻膏糗柜
妝楚辭招魂柜妝蜜餌有饌餌些注以蜜和米麪煎熬
作柜妝也馥案膏糗今以麪作先煎以膏次和以蜜著
手易汗故看書畫不復設寒具

僵

方言南楚凡罵庸賤謂之田儻高誘淮南注稷秬塊椎也三輔謂之儻案集韻儻與嫿同說文嫿遲鈍也闢嫿亦如之馥謂秬塊椎鈍器也故謂之田儻

李尚隱

夏英公古文四聲韻引李尚隱字畧或改作商隱案舊唐書開元二十八年六月太子賓客李尚隱卒新唐書亦有傳

通之

張謙中復古編跋尾有篆書數行署曰通之不知爲誰後見董史皇宋書錄云張察字通之成都記云成都人

嘗帥鼎州以篆名今成都題榜往往通之筆也案董吏
字更良其自序在淳祐壬寅跋尾在咸淳乙丑

薦柱

南齊王敬則傳材官薦易殿柱案工欲換柱先承以他
木而薦其下使高於舊柱則舊柱方可抽去薦猶藉也

女字繫姓

後漢書班昭字惠班荀采字女荀此猶左傳稱敬姜懿
姬蓋女子既嫁從夫之姓故繫以本姓明其所出

魃

通鑑宋前廢帝入廟指世祖像曰渠大魃鼻如何不魃

立召畫工令魑之注魑壯加反鼻上匏也南史前廢帝紀肆罵孝武帝爲麟奴玉篇作魑壯加切鼻上匏也馥案魑俗字猶植省作查今俗言糟鼻人不飲酒枉受虛名卽魑鼻也廣韻又作𪔐

東閣

漢書朱雲傳薛宣爲丞相雲往見之宣備主禮謂雲曰在田野亾事可留我東閣雲曰小生乃欲相吏邪說者謂公孫宏開東閣延賢人宣亦欲致雲於客館馥以爲果如所言則雲不應有相吏之語案丞相掾屬有祭酒欲置雲爲東閣祭酒耳曹操作相猶有軍謀祭酒胡廣

注漢官篇武帝時丞相設四科以辟人德妙爲第一科
乃補南閣祭酒考南閣祭酒爲太尉西曹掾許叔重曾
官此職隸釋司空孔扶碑有東閣祭酒丞相亦當有之
魏書羊肅武定末儀同開府東閣祭酒

棺和

廣雅棺當謂之𦵏又云𦵏棺頭玉篇作𦵏呂氏春秋昔
王季歷葬陽山之尾𦵏水齧其墓見棺之前和高誘曰
棺題曰和謝惠連祭古冢文中有二棺兩頭無和

集韻𦵏沙丘絕水橫流也

竭來

張衡思元賦回志竭來從元謀陸機弔魏武帝文詠歸
塗以返旆登峻澠而竭來案竭去也竭來猶去來故陶
公有歸去來辭

班劬

漢官儀班劬以虎皮飾之晉公卿禮秩諸公及開府位
從公者給虎賁三十人持班劬焉案通鑑宋太子劭使
班劬排江湛注云班劬持劬爲班列在車前又唐高祖
葬平陽昭公主詔加班劬四十人注云班列也持劬成
列夾道而行也宋書張敬兒旣得開府又望班劬與人
曰我車邊猶少班闌物

象輅

本朝鑾儀凡有事於天地壇則象輅先行九馬僅牽一輅一象駕之如輕車焉案晉諸公贊云南越致馴象爲作車黃門鼓吹數十人令越人騎之每正朝大會皆入充庭帝行則以象車導引以試橋梁

黑水

山海經大荒經西海之南流沙之濱赤水之後黑水之前有大山名曰崑崙之丘馥案黑水謂泐澤西山經長沙之山泐水出焉北流注於泐澤郭注泐水色黑也西次三經槐江之山丘時之水出焉而北流注於泐水南

望崑崙崑崙案經言南望是崑崙在黑水之前矣

頡頏

揚雄解嘲鄒衍以頡頏而取世資夏侯湛東方朔畫贊
苟出不可以直道也故頡頏以傲世案頡頏猶上下浮
沈也詩燕燕于飛頡頏之傳云飛而上曰頡飛而下
曰頏揚雄長楊賦魚吉而鳥眴

澍

浙或作澍又作制莊子外物篇自制河以東浙或作獬
淮南汜論訓獬徇之驚以殺子陽折亦作制莊子庚桑
楚尋常之溝而鯢鮪爲之制注制折也小魚得曲折也

書呂刑制以刑墨子引作折則刑論語折獄魯論作制
獄崔駰達旨陰陽始分天地初制皇綱云敘帝紀乃設
制折聲相近

膚寸

公羊傳膚寸而合尙書大傳作扶寸鄭注四指爲扶案
此言雲之薄小也應休璉與從弟書扶寸肴脩味逾方
丈

列

任昉彈劉整文輒攝整亾父舊使奴海蛤到臺辨問列
稱云云沈約彈王源文輒攝媒人劉嗣之到臺辨問嗣

之列稱云云案司馬遷報任安書拳拳之忠終不能自列李善引說文列分解也

先游

鄒陽獄中上書故有人先談則枯木朽株樹功而不忘李善云談或爲游案先游卽先容故下文云素無根柢之容

脰

鹽鐵論羊淹雞寒曹子建七啟寒芳苓之巢龜李善云寒今脰肉也案廣韻脰與鯖同卽五侯鯖楚辭煎鯖臠雀

撰

唐書百官志史館修撰掌國史今以作文爲撰文案古無撰字說文僎具也晉書音義引字林詮具也謂具說事理馥謂僎具亦作此解魏文帝與吳質書僎其遺文都爲一集此編集朋友之文亦曰僎

翬

史記天官書其翬者類闕旗晉書音義云翬字見蒼頡篇

飲器

戰國策趙襄子殺智伯漆其頭以爲飲器注云溺器或

日酒器案溺器是也晉書載記姚方成三斬徐嵩漆其首爲便器

充隱

顏延生誦舊句云市多充隱客朝有噉名僧案晉書桓玄傳玄以歷代咸有肥遯之士而已世獨無乃徵皇甫謐六世孫希之爲著作并給其資用皆令謝而不受號曰高士時人名爲充隱

援

謝康樂有田南樹園激流植援詩云激澗代汲井插槿當列墉晉書桑虞傳虞園瓜果初熟有人踰垣盜之虞

以園援多棘刺恐盜驚走致傷使奴爲之開導馥案援
集韻作援籬也音于眷切

貂

或問釋名云貂短也其義何解荅之曰貂當爲貂廣韻
貂短尾犬也晉書張天錫傳從事中郎韓博有口才桓
溫使刁彝嘲之彝謂博曰君是韓盧後邪博曰卿是韓
盧後溫笑曰刁以君姓韓故相問焉他自姓刁那得韓
盧後邪博曰明公脫未之思短尾者則爲刁也一坐推
歎焉案貂刁聲近故借爲說

齷齪

史記司馬相如傳委瑣握齷漢書酈食其傳握齷好奇
禮應劭曰握齷急促之貌韋昭曰握齷小節也晉書張
茂傳茂築靈鈞臺周輪八十餘堵高九仞吳紹諫曰遐
方異境窺我之齷齷也必有乘人之規案紹意以修臺
爲不急之小事與韋說合樂府放歌行小人自齷齷安
知曠土懷狄仁傑對武后曰豈文士齷齷不足以成天
下務哉

諛

集韻諛輕也江東語案晉書趙王倫傳愚歸輕諛淮南
修務訓越人有重遲者而人謂之諛注諛輕利善趨者

說文諄下云一曰諄猶案卽狡獪廣雅諄也

假

趙盾將朝尙早因假寐卻詵葬其母於所住堂北壁外
謂之假葬潘岳爲楊駿主簿駿誅當坐公孫宏護持岳
謂之假吏

麴

晉書皇甫謐傳況臣糠麴糲之雕胡玉篇麴與麴同大
麥也一切經音義麴麥糠也齊民要術旱稻法宜五六
月暎之以擬麴麥

哈

廣韻哈笑也呼來切胡注通鑑云哈呼來翻楚人謂相
啁笑曰哈案古無此字蓋卽嗤之異文楚辭九章忠何
辜以遇罰兮亦非余之所志也行不羣以顛越兮又衆
兆之所哈也束皙立居釋束皙閒居門人竝侍方下帷
深談隱几而哈含豪散藻考撰同異馥謂楚辭與志爲
韻立居釋與侍異爲韻則廣韻之呼來切乃轉音也

張仲景

今醫家以張仲景爲宗主而見稱於前人者絕少惟皇
甫謐釋勸云若皇帝創制於九經岐伯剖腹以蠲腸扁
鵲造號而尸起文摯徇命於齊王醫和顯術於秦晉倉

公發祕於漢皇華佗存精於獨識仲景垂妙於定方謚
又云仲景論伊尹湯液爲十數卷案藝文志有湯液經
法三十二卷事物紀原湯液經出於商伊尹

何侯

晉書王祥傳文帝爲晉王祥與荀顗往謁顗謂祥曰相
王尊重何侯旣盡敬今便當拜也案何侯謂何曾曾與
高柔鄭沖入見晉王曾獨致拜盡敬柔沖揖而已

文帝晉書誤作武帝何曾傳不誤

蔡文姬

蔡中郎共生幾女不可考而文姬則其少女也嫁上黨

太守羊衞者年長於文姬卽晉景帝羊后之母

羊祜傳父衞上黨太守祜蔡邕外孫景獻皇后同產弟

安車

周禮王后有安車漢徵年老有道之士亦以安車晉書
輿服志坐乘爲安車倚乘爲立車

緹縹

楚辭九懷襲英衣兮緹縹洪氏補注縹緹衣也馥謂此
據說文爲說後漢書應劭傳緹縹十重注云緹縹謂鮮
明之衣與洪異

鬪場

宋書天竺國傳鬪場禪師窟東安談義林或問鬪場所
在案晉成帝咸和中詔內外諸君戲兵於南郊之場故
其地因名鬪場見晉書禮志

職儀

太平御覽多引齊職儀案梁書周興嗣傳所撰皇帝實
錄皇德記起居注職儀等百餘卷當卽興嗣撰也

油火

余油紙百翻越歲取用皆有火炷小孔友人言其油衣
亦自然案梁書樂藹傳時長沙宣武王將葬而車府忽

於庫失油絡欲推主者藹曰昔晉武庫火張華以爲積油萬石必然今庫若有灰非吏罪也旣而檢之果有積灰時稱其博物宏恕焉

𠂔


尙書序皋陶矢厥謨釋文云矢本又作𠂔隸釋唐扶頌惟直如𠂔案說文匕部𠂔下云𠂔古文矢字馥謂𠂔隸體從古文變也廣韻以𠂔爲俗字

憚


梁書裴子野傳性不憚憚情無汲汲案廣雅憚憚懷憂也馮衍顯志賦終憚憚而洞疑

卯蒜

夏小正十有二月納卯蒜古今注蒜卯蒜也俗人謂之小蒜馥案卯蒜澤艸冬生故十二月納之

莊君述祖曰納卯蒜當爲納民祔民古文作隸譌作卯又於祔上加艸

三刀爲州

晉書王濬傳三刀爲州字州本不從刀因班辨從刀隸作似州之半體故謂州爲三刀慕容詳時童謠云八井三刀卒起來議者謂魏師盛於冀州此亦以三刀爲州

油油

箕子麥秀歌禾黍油油束皙補亡詩厥草油油案禹貢
厥草惟繇傳云繇茂也釋文引馬融注抽也馥謂油繇
當爲繇說文繇艸盛兒

易坤卦其所繇來者漸矣又繫辭爻繇之辭所以明
得失韋昭云繇由也吉凶所由生也漢書文帝紀列
侯亦無繇教訓其民顏注繇讀與由同

離樓

長門賦離樓梧而相撐李善注離樓橫聚衆木之貌馥
案說文廛屋麗廛也囧窗牖麗廛闔明此賦言窗牖疏

服離樓梧撐皆異文也梧當爲梧撐當爲堂

行藥

文選有鮑明遠行藥至城東橋詩五臣注服藥行而宣導之馥案潘安仁閒居賦體以行和藥以勞宣嘗膳載加舊病有痊行藥卽勞以宣藥也李善引左傳注宣散也

焮忽

張平子思元賦乘焮忽兮馳虛無舊注引服虔甘泉賦注焮風也五臣云焮忽虛無皆空也馥案說文颺扶搖風也颺疾風也焮忽卽颺颺之省文

晉書五行志引京房易傳臣易上政茲謂不順厥風
大猷發屋

拾

班孟堅幽通賦匪黨人之敢拾兮應劭曰拾更也自謙
不敢與鄉人更進也案儀禮鄉射禮取弓矢拾疏云遞
取弓矢也禮記投壺左右告矢具請拾投疏云賓主更
遞而投也

籤

今於神前求籤問卜卽識緯之遺說文識籤竝訓驗

蛭

上林賦獬胡穀蛭李善云蛭未聞案山海經卽公之山有獸焉其狀如龜而白身赤骨名曰蛭是可以禦火

料

蜀都賦神農是嘗盧附是料五臣注扁鵲俞附皆料此藥而用之馥謂料量也蓋言料量藥之升勺銖兩今猶謂合藥爲一料

移

爾雅釋宮連謂之移郭注堂樓閣邊小屋今呼之移廚連觀也東京賦諺門曲榭五臣注宮室接謂之諺西京賦聯以昆德李善注引說文聯連也廣韻榭移也馥案

移謬正作謬謬門趙策作謬門高誘注謬別也說文謬離別也周景王作洛陽謬臺然則東京賦之謬門因謬臺得名薛綜以謬門爲冰室門未審所據或以爲連或以爲別據郭注則小屋連於大屋實別成一構其義相通

蜀先主名字

蜀先主名備字玄德備謂五采備考工記畫績之事五采備謂之繡詩終南傳云五色備謂之繡馥案五色至黑乃備故字玄德

耗

張華博物志周穆王有犬名耗案玉篇耗力才力吝二切强毛也亦作髦絲馥謂竝當作縻說文縻彊曲毛可以箸起衣从犛省來聲

酌

玉篇酌許具切酌同上案句當讀鈎音非章句之句鈎凶聲相近春秋考異郵喉凶合韻是也

灌佛

宋書劉敬宣傳敬宣八歲喪母四月八日見衆人灌佛乃下頭上金鏡以爲母灌案灌佛鑄金像佛也文選七命乃鍊乃鑠萬辟千灌李善注灌謂鑄之王粲刀銘灌

辟以數又案四月八日鑄佛日也顏運生得一銅佛有文云開皇十九年四月八日

釋詁釋言釋訓

趙宦光曰通古合今日釋詁以今合古曰釋言釋其所釋曰釋訓

刊山

隋書徐則傳陳太建時應詔來又辭入天台山太傅徐陵爲之刊山立頌案刊山卽摩崖班孟堅封燕然山銘乃遂封山刊石昭銘盛德

以舟量物

魏志鄧哀王沖生五六歲智意所及有若成人時孫權
致巨象太祖欲知其斤重訪之羣下咸莫能出其理沖
曰置象大船而刻其水痕所至稱物以載之則校可知
矣太祖大悅馥案古有此法符子曰朔人獻燕昭王以
大豚命豕宰養六十五年大如沙墳王令衡官橋而量
之折十橋又命水官舟而量之其重千鈞此事在魏太
祖前蓋後人之智偶合於古耳

生

魏書儒林張吾貴傳曾在夏學聚徒而不講傳生徒竊
云張生之於左氏似不能說又徐遵明傳師事張吾貴

乃私謂其友人曰張生名高而義無檢格馥案漢經師
多稱生如伏生歐陽生是也賈誼董仲舒皆稱生史記
吾聞之周生後漢書黃憲傳陳蕃周舉仰憲爲黃生潘
岳秋興賦善乎宋生之言七畧禮家先魯有桓生劉歆
移太常博士書膠東庸生之遺學鄭康成書序贊我先
師棘下生又案先生或單稱一字貢禹傳朕以生有伯
夷之廉史魚之直顏注生謂先生也古今人表嚴先生
史記越世家稱莊生蘇秦傳蘇生徐廣曰生一作先漢
書梅福傳叔孫先晁錯傳學申商刑名於軹張恢先所
徐廣曰先卽先生此傳未有鄧公漢書作鄧先顏注鄧

先猶言鄧先生也

亢閬

說文閬門高也新附閬字云閬閬高門也甘泉賦閬閬
閬其寥廓兮魏書明元六王傳高允曰易稱亢龍有悔
窮高曰亢詩縣釋文云伉本又作亢韓詩作閬周禮閬
人疏引詩作亢文選西京賦高門有閬李善注云毛詩
皋門有位與閬同案說文伉閬也閬伉當爲阬

獨斷

南齊書禮志云及至東京太尉胡廣撰舊儀左中郎蔡
邕造獨斷又云晉初荀勗因魏代前事撰爲晉禮羊祜

任愷庾峻應貞共刪集成百六十五篇後摯虞傳咸續
續此製今虞之決疑注是遺事也馥案虞之決疑與蔡
氏獨斷同意皆一代朝儀也今獨斷已非完書後人不
知爲史家典要等之稗官說部豈不誣乎

補文選注

隋書禮儀志指南車大駕出爲先啓之乘漢初置俞兒
騎竝爲先驅左太沖曰俞騎騁路指南司方志又曰沈
約云親幸耕藉御之三蓋車一名芝車又名耕根車置
耒耜於軾上卽潘岳所謂紺轅屬於黛耜者也馥謂此
二條可作藉田賦注李善五臣皆漏引

𧈧

詩螽斯羽薨薨今又蟲飛薨薨玉篇𧈧蟲飛也

𧈧

莊子枝指崔云音歧謂指有歧也馥案或借枳字釋地中有枳首蛇焉郭云歧頭蛇也孫云蛇有枝首者

強近

隋書許善心傳單宗少強近虛室類原顏案強謂強盛近謂近幸李密表外無期功強近之親王僧孺與何炯書外無奔走之友內乏強近之親月令雖有貴戚近習注云近習天子所親幸者

點

袁宏三國名臣贊如彼白圭質無塵點司馬遷報任安書適足以見笑而自黜耳北史李彪傳臣罪旣如此宜伏東皋之下不應遠點屬車之清塵甄琛傳緇點皇風塵鄙王化隋書裴政傳豈敢以無端之言妄相點累房彥謙傳非止誣陷良善亦恐大點皇猷王孝籍傳追究執事有點清塵宋書庾炳之傳非但虧點王化乃治亂所由魯爽傳兄弟闔門淪點僞授徐湛之傳豈不知醜點難嬰仗劒爲易謝莊傳樹無益之軌招塵點之風魏書道武七王傳非直有點清風臣恐取嗤荒遠晉書郭

璞傳塵點日月穢亂天聽沈約彈王源文點世塵將被
比屋通鑑唐太宗曰寸雲點日何損於明馥案點與玷
同南齊書庾杲之傳玷塵明世文選補亾詩鮮侔晨葩
莫之點辱李善注引孝經鉤命決曰名毀行廢玷辱先
人楚辭九辨或黜點而汙之注曰點汙也點玷古字通
晉書何琦傳塵黷清朝黷亦點也

加治點

史傳言文不加點又言文不治點案加謂增字治謂改
字點謂減字

陳書蔡景歷傳對使人荅書筆不停書文不重改通

鑑宋毛德祖遣人說奚斤云公孫表與之連謀每荅表書多所治定表以書示斤斤疑之

列口

漢志樂浪郡有列口縣卽方言所傳洌水

帶

周易訟卦釋文云帶音帶亦作帶禮雜記率帶釋文同馥案帶漢碑作帶楷書變作帶非異文也詩都人士釋文作帶

需

周易釋文需從雨重而者非案漢碑需多作需故曰重

而

專輒

顏氏家訓多用專輒字蓋習語也王濬上書案春秋之義大夫出疆由有專輒桓溫上表義存社稷之利不顧專輒之罪王弘上表敢引覆餗之刑甘受專輒之罪范甯傳甯若以古制宜崇自當列上而敢專輒惟在任心北史楊愔傳專輒之失罪合萬死又崔鴻傳愚賤無因不敢輕輒南齊書盧陵王傳凡諸服章自今不啟吾知復專輒作者後有所聞當復得痛杖擅弓汰哉叔氏專以禮許人正義云專輒許諾匡謬正俗劉周之徒音夾

爲賴亦爲專輒晉王蘊爲吳興太守郡荒人飢開倉贍恤主簿執諫蘊曰專輒之愆罪在太守

涉躐

漢時書少學者皆能專精晉宋以後四部之書卷袤千萬遂有涉躐之學北齊書柳世隆傳世隆性愛涉躐啟太祖借祕閣書上給二千卷

水冶

彰德府西行四十里有地名水冶蓋昔人作水排處因以名也排謂排囊以韋爲之鼓風吹炭用冶鐵巧者以水代人故曰水冶張璠漢記杜詩爲太守爲冶家作水

排後漢書杜詩傳造水排鑄農器注云冶者爲排以吹炭今激水鼓之武昌記北濟湖本是新興冶塘湖元嘉初廢水冶冶者以水排冶令顏茂以塘數破壞難施功力因廢水冶以人鼓排謂之步冶魏志韓暨爲監冶謁者舊時冶作馬排每用馬百匹更作人排又費功暨乃因長流爲水排利益三倍今彰德水冶久廢昧其名義故土人不知也

排玉篇作囊云吹火囊蒲拜切廣韻又作韞云韞囊吹火

風不鳴條

易稽覽圖曰太平時陰陽和合風雨會同海內不偏地
有阻險故風有遲疾雖太平之政猶有不能均惟平均
乃不鳴條

涎

說文次慕欲口液也俗作涎賈誼書垂涎相告又作𦞦
文選江賦噴浪飛𦞦案涎次聲近張平子東京賦乃羨
公侯卿士登自東塗薛綜注羨延也周禮璧羨以起度
鄭司農云羨長也史記衛世家共伯人釐侯羨自殺索
隱云羨音延

雪桃

家語黍以雪桃蓋桃有毛以黍沐之玉藻沐稷而齷梁
正義云取稷梁之湯汁用將洗面沐髮竝須滑故也列
子齊景公雪涕晏子春秋作刷涕釋詁刷清也馥謂當
作叔說文叔拭也韓非子管仲雪桓公之恥于小人而
生桓公之恥於君子矣史記貨殖傳范蠡既雪會稽之
恥楚世家王雖東取地於越不足以刷恥必且取地於
秦而後足以刷恥於諸侯孟子寡人恥之願比死者一
洒之唐書李靖傳足澡吾渭水之恥矣蕭銑傳是以痼
心疾首思刷厥恥謝莊詩雪怨園邑埽恥瀛縣李華樂
生讚旣佐弱燕削恥南伐嵇康琴賦懲躁雪煩然則叔

也洒也澡也沐也掃也削也皆雪也高注淮南云雪拭也

爾雅釋木桃曰膽之孔穎達曰桃多毛拭治去毛令色青滑如膽也

彭越

漢有彭越卽彭蠡崔豹古今注彭蠡小蟹也嶺表錄異彭蠡吳呼爲越蓋語譌也晉書夏統傳或至海邊拘蠡蠡以資養馥案古人名多取物名故知彭越取義彭蠡也古今注又云彭蠡其有螯偏大者名擁劒俗謂之越王劒馥謂蠡轉爲越故俗又傳會爲越王耳集韻彭蠡

似蟹而小或作蝟

漸離

史記刺客列傳有高漸離廣韻蜥蜴蟲名

貼帖

玉篇貼字云以物質錢案宋書何承天傳時有尹嘉者
家貧母熊自以身貼錢爲嘉償責南齊周顒傳販傭貼
子權赴急難魏書肅宗紀七品六品祿足代耕亦不聽
錮貼店肆爭利城市任昉奏彈劉整云整兄弟未分財
之前整兄寅以當伯貼錢七千共衆作田又額外更加
爲帖通鑑隋崔仲方上書今惟須武昌以下蘄和滁方

不刊卷三
吳海等州更帖精兵胡注帖添帖

染輪

子虛賦割鮮染輪李奇曰鮮生也染濡也切生肉染車輪鹽而食之賦又云脲割輪焠韋昭曰焠謂割鮮焠輪也郭璞曰焠染也馥謂染輪田獵血祭之禮春官大祝辨九祭六曰濡祭注云濡讀爲虞芮之芮馥謂芮焠聲近焠輪卽濡祭說文濡染也史記荆軻傳使工以藥焠之索隱曰焠染也宋書南史以蠕蠕爲芮芮胡注通鑑芮芮卽蠕蠕魏呼柔然爲蠕蠕南人語轉爲芮芮

樨楷

梁書劉杳在任昉坐有人餉昉楮酒而作楬字昉問杳此字是不杳對曰葛洪字苑作木旁若馥案張衡南都賦棗若榴廣雅楮榴柰也集韻楬直忍切木名汁可爲酒楮楬音別自是兩物作楬者是

葩

幽通賦安惛惛不葩兮曹大家曰葩避也馥謂義本周易肥遯釋文引子夏傳肥饒裕疑古周易別有說

簋

五經文字艸部有簋字云見禮經注案士冠禮注簋簠竝從竹說文口盧飯器以柳爲之或从竹去聲亦不从

艸類篇口或作蔭

校

玉篇校報也此與顏子犯而不校合郭忠恕佩觿分校
校爲二字周禮夏官校人釋文云校字從木若從手旁
是比校之字耳

韌

字林韌柔也通俗文作𦉰云物柔曰𦉰管子筋𦉰而骨
強

都布

後漢書公孫述爲馬援制都布單衣案通鑑漢明帝行

養老禮三老服都紵大袍注云績紵以爲美布故曰都紵都布布之美者也纂文都致錯履無極皆布名

白疊布

史記貨殖傳荅布千匹注云荅布白疊也趙書石勒建平二年大宛獻白疊魏畧文帝詔曰代郡黃布爲細樂浪練爲精江東大末布爲白故不如白疊布鮮潔也宋元嘉起居注毘加梨國奉細疊兩張吳時外國傳諸薄國女子織作白疊花布梁書高昌國有草實如鹽鹽中絲如細纒名爲白疊子國人多取織以爲布布甚軟白唐書高昌有草名白疊擷花可織爲布又云婆利出吉

貝吉貝草也緝其花爲布粗曰貝精曰疊又云杜薄國女子作白疊花布金毘利逝國衣朝霞白疊隋書眞臘國常服白疊王維詩手巾花疊淨杜甫詩光明白疊巾是也玉篇作氎云毛布也廣韻氎細毛布廣志白氎布毛織王建詩毛氎家家織梅堯臣詩童袍毳氎鮮是也後漢西南夷傳哀牢夷知染采文繡罽毼帛疊闌干細布織成文章如綾錦唐書驃國傳鈴鉞皆飾條紛以花氎縷爲藻又云樂工皆崑崙衣絳氎朝霞爲蔽膝溫庭筠詩錦疊空林委墜紅是也南史扶南王坐則偏跼翹膝垂左膝至地以白疊敷前方回詩坐寒乏氎氎是也

方勺曰閩廣多種木綿紡績爲布名曰吉貝海南蠻人織爲巾卽古所謂白疊布

赭白馬

顏延年赭白馬賦注家不言馬從何來馥以爲高句驪所獻宋書高句驪王高璉晉安帝義熙九年遣長史高翼奉表獻赭白馬宋高祖踐阼又遣長史馬婁等詣闕獻方物馥案宋時所獻雖不明言有馬以晉時方物考之知赭白出高驪

札樸第三

山陰 李信 校正